



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

PROT. N.2379

**ORDINÀNTZIA n. 6 de su 5 de martzu de su 2021**

**Ogetu:** Ulteriores mesuras istraordinàrias urgentes de cuntrastu e preventzione de s'isparghidura epidemiològica dae covid-19 in su territòriu regionale de sa Sardigna. Ordinàntzia in cunforma a s'art. 32, comma 3, de sa lege de su 23 de nadale de su 1978, n. 833 in matèria de igiene e sanidade pùblica.

**SU PRESIDENTE**

- BIDU s'art. 32 de sa Costituzione;
- BIDU s'Istatutu Ispetziale pro sa Sardigna e sas normas de atuatzione relativas;
- BIDA sa lege regionale de su 7 de ghennàrgiu de su 1977, n. 1 chi cuntenit "*Normas subra de s'organizatzione amministrativa de sa Regione Sarda e subra de sas cumpetèntzias de sa Giunta, de sa Presidèntzia e de sos Assessorados regionales*";
- BIDA sa lege de su 23 de nadale de su 1978, n. 833 "*Istituzione de su servìtziu sanitariu natzionale*" e in particolare s'art. 32 chi disponet "*su Ministru de sa Sanidade podet emitere ordinàntzias de caràtere contingibile e urgente, in matèria de igiene e sanidade pùblica e de politzia veterinària, cun eficàtzia istèrrida a totu su territòriu natzionale o a parte de issu chi cumprendet prus regiones*", e puru "*in sas matessis matèrias sunt emitidas dae su presidente de sa giunta regionale e dae su sindigu ordinàntzias de caràtere contingibile e urgente, cun eficàtzia istèrrida a manera rispetiva a sa regione o a parte de su territòriu suo chi cumprendet prus comunes e a su territòriu comunale*";
- BIDA sa declaratzione de s'Organizatzione mundiale de sa sanidade de su 30 de ghennàrgiu de su 2020 cun sa cale s'epidemia dae covid-19 est istada valutada comente un'emergèntzia de sanidade pùblica de rilevàntzia internatzionale;
- BIDA sa delibera de su Consìgiu de sos Ministros de su 31 de ghennàrgiu de su 2020 chi cuntenit "*Declaratzione de s'istadu de emergèntzia in cunsighèntzia de s'arriscu sanitariu connessu a s'isvilupu de patologias chi derivant dae agentes virales trasmissìbiles*";



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

- BIDA s'ordinàntzia de su Capu de su Dipartimentu de sa protetzione tzivile n. 630 de su 3 de freàrgiu de su 2020 chi cuntenit "*Primos interventos urgentes de protetzione tzivile in relatzione a s'emergèntzia relativa a s'arriscu sanitàriu connessu a s'isvilupu de patologias chi derivant dae agentes virales trasmissibiles*";
- BIDU su decretu de su Capu de su Dipartimentu de sa protetzione tzivile n. 627 de su 27 de freàrgiu de su 2020 chi nùmenat su Presidente de sa Regione Sardigna, sugetu atuadore de sos interventos segundu su OCDPC n. 630/2020;
- BIDA sa declaratzione de s'Organizatzione mundiale de sa sanidade de s'11 de martzu de su 2020 cun sa cale s'epidemia dae covid-19 est istada valutada comente "pandemia" in cunsideru de sos livellos de isparghidura e gravidade segudados a livellu globale;
- BIDU su decretu lege de su 17 de martzu de su 2020, n. 18, chi cuntenit "*Mesuras de afortigamentu de su servitziu sanitàriu natzionale e de sustennu econòmicu pro familias, traballadores e impresas connessas a s'emergèntzia epidemiològica dae covid-19*"; mudadu, cun modificas, in sa lege de su 24 de abriale de su 2020, n. 27;
- BIDU su decretu-lege de su 25 de martzu de su 2020, n. 19, chi cuntenit "*Mesuras urgentes pro fàghere fronte a s'emergèntzia epidemiològica dae covid-19*", mudadu, cun modificas, in sa lege de su 22 de maju de su 2020, n. 35 e a manera ulteriore modificadu dae su DL n. 83/2020, in particolare sos articulos 1 e 2, comma 1;
- BIDU su decretu lege de su 16 de maju de su 2020, n. 33 chi cuntenit "Ulteriores mesuras urgentes pro fàghere fronte a s'emergèntzia epidemiològica dae covid-19" e publicadu in sa Gazzetta Ufficiale n. 125 de su 16 de maju de su 2020, mudadu, cun modificas, in sa lege de su 14 de trìulas de su 2020, n. 74 e a manera ulteriore modificadu dae su DL n. 83/2020;
- BIDU su decretu lege de su 19 de maju de su 2020, n. 34 "*Mesuras urgentes in matèria de salute, sustennu a su traballu e a s'economia, e puru de politicas sotziales connessas a s'emergèntzia epidemiològica dae covid-19*", mudadu, cun modificas, in sa lege de su 17 de trìulas de su 2020, n. 77;
- BIDAS sas ordinàntzias de su Ministru de sa Salute de su 30 de làmpadas de su 2020, de su 9 de trìulas de su 2020, de su 16 de trìulas de su 2020, de su 24 de trìulas de su 2020, de su 30 de trìulas de su 2020, de su 1 de austu de su 2020, de su 12 de austu de su 2020 e de su 16 de austu de su



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

2020;

- BIDU su decretu lege de su 30 de trìulas de su 2020, n. 83 “Mesuras urgentes connessas cun s’iscadèntzia de sa declaratzione de emergèntzia epidemiològica dae covid-19 deliberada su 31 de ghennàrgiu de su 2020” cun su cale si disponet sa pròroga de s’istadu de emergèntzia a su 15 de santugaine de su 2020;
- BIDU su decretu lege de su 14 de austu de su 2020, n. 104 “Mesuras urgentes pro su sustennu e su rilàntziu de s’economia”;
- BIDU su decretu-lege de su 7 de santugaine de su 2020, n. 125, chi cuntenit “Mesuras urgentes connessas cun sa pròroga de sa declaratzione de s’istadu de emergèntzia epidemiològica dae covid-19 e pro sa sighida operativa de su sistema de allerta covid, e puru pro s’atuatzione de sa direttiva (UE) 2020/739 de su 3 de làmpadas de su 2020”, mudadu cun modificatziones in sa lege de su 27 de santandria de su 2020, n. 159;
- BIDU su decretu-lege de su 28 de santugaine de su 2020, n. 137, chi cuntenit: “Ulteriores mesuras urgentes in matèria de tutela de sa salute, sustennu a sos traballadores e a sas impresas, giustitzia e siguresa, connessas a s’emergèntzia epidemiològica dae covid-19”, mudadu cun modificatziones in sa lege de su 18 de nadale de su 2020, n. 176;
- BIDU su decretu-lege de su 18 de nadale de su 2020, n. 172, chi cuntenit: “Ulteriores dispositziones urgentes pro fàghere fronte a sos arriscos sanitàrios connessos a s’isparghidura de su virus covid-19”, mudadu cun modificatziones in sa lege de su 29 de ghennàrgiu de su 2021, n. 6;
- BIDU su decretu-lege de su 12 de freàrgiu de su 2021, n. 12, chi cuntenit: “Ulteriores dispositziones urgentes in matèria de cuntenimentu de s’emergèntzia epidemiològica dae covid-19”;
- BIDU su decretu-lege de su 23 de freàrgiu de su 2021 n. 15, chi cuntenit: “Ulteriores dispositziones urgentes in matèria de ispostamentos in su territòriu natzionale pro su cuntenimentu de s’emergèntzia epidemiològica dae covid-19”;
- BIDU su documentu chi cuntenit “Preventzione e risposta a covid-19: evolutzione de s’istrategia e pianificatzione in sa fase de transitzione pro su perìodu atòngiu-ijerrale” predispostu dae su Ministèriu de sa Salute, dae s’Istitutu Superiore de Sanidade, dae su Coordinamentu de sas Regiones e Provìntzias autònomas chi frunit elementos generales pro afortiare sa *preparedness* pro fàghere fronte a sas infetziones in s’istajone atòngiu-ijerru de su 2020-2021 (prot. 7474 de su 12 de santugaine de su 2020 Cunferèntzia de sas Regiones e de sas Provìntzias autònomas);



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

- BIDU su decretu de su Presidente de su Consìgiu de sos Ministros de su 14 de ghennàrgiu de su 2021, chi cuntenit: “Ulteriores dispositziones atuativas de su decretu-lege de su 25 de martzu de su 2020, n. 19”, mudadu, cun modificatziones, in sa lege de su 22 de maju de su 2020, n. 35, chi cuntenit “Mesuras urgentes pro fàghere fronte a s'emergèntzia epidemiològica dae covid-19”, de su decretu- lege de su 16 de maju de su 2020, n. 33, mudadu, cun modificatziones, in sa lege de su 14 de trìulas de su 2020, n. 74, chi cuntenit “Ulteriores mesuras urgentes pro fàghere fronte a s'emergèntzia epidemiològica dae covid-19”, e de su decretu-lege de su 14 de ghennàrgiu de su 2021 n. 2, chi cuntenit “Ulteriores dispositziones urgentes in matèria de cuntenimentu e preventzione de s'emergèntzia epidemiològica dae covid-19 e de acumprimentu de sas eletziones pro s'annu 2021”;
- TORRADAS A CRAMARE sas Ordinàntzias pretzedentes pròpias emitidas in cunforma a s'articulu 32, de sa lege de su 23 de nadale de su 1978, n. 833 in tema de mesuras pro sa gestione de s'emergèntzia sanitària ligada a s'isparghidura de sa sindrome dae covid-19;
- CUNSIDERADU s'isvilupu de sa situatzione epidemiològica, su caràtere a manera particolare difusivu de s'epidemia e sa crèschida de sos casos in su territòriu natzionale;
- BIDA sa tzirculare de su Ministèriu de sa Salude n. 3787 de su 31 de ghennàrgiu de su 2021, chi at comentu ogetu: “Aggiornamentu subra de s'isparghidura a livellu globale de sas variantes noas Sars CoV-2, valutazione de s'arriscu e mesuras de controllu;
- BIDA s'ordinàntzia de su Ministèriu de sa Salude in data 27 de freàrgiu de su 2021, publicada su 28 de freàrgiu de su 2021 in sa GURI, e in particolare s'art. 1, pro su cale in cunforma a *s'articulu 1, commas 16 sexies e 16 septies de su decretu lege de su 16 de maju de su 2020, n. 33, a decùrrere dae su 1<sup>a</sup> de martzu de su 2021 a sa Regione Sàrdigna si àplicant sas mesuras segundu sa g.n. “zona bianca”, comentu determinadas dae su decretu de su Presidente de su Consìgiu de sos Ministros de su 14 de ghennàrgiu de su 2021 e decretos imbenientes adotados in cunforma a s'art. 2, comma 1, de su decretu lege de su 25 de martzu de su 2020, n. 19;*
- CUNSIDERADU chi segundu s'ordinàntzia tzitada, *pro compidare sos efetos de su rilàsciu de sas mesuras anticontàgiu in sa Regione Sàrdigna, est istituidu unu tàulu tècnicu istituzionale cumpostu dae sos rapresentantes de su Ministèriu de sa Salude, de s'Istitutu Superiore de sa Sanidade e de sa Regione Sàrdigna;*
- BIDU su Decretu de su Presidente de su Consìgiu de sos Ministros de su 2 de martzu de su 2021 e sos allegados relativos e, in particolare, s'art. 7 chi detat mesuras de cuntenimentu de su contàgiu aplicàbiles a sa zona bianca;



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

- CUNSIDERADU** chi bisòngiat detare ulteriores dispositziones chi punnant a cuntrastare sa ripresa eventuale de s'isparghidura virale dae covid-19 e a garantire, in su matessi tempus, sa siguresa de sos utentes e de sos traballadores de su setore de s'iscola e de sos trasportos, assigurende a sa matessi manera sa fruitzione de su servitziu essenziale de su trasportu pùblicu locale;
- BIDAS** sas motivatziones cuntènnidas in s'ordinàntzia n. 4 de su 28 de freàrgiu de su 2021, chi si intendent inoghe torradas a cramare a manera integrale;
- BIDU** s'art. 57, comma 4 de su DPCM de su 2 de martzu de su 2021, pro su cale "sas dispositziones de su decretu presente si àplicant a sas Regiones a istatutu ispetziale e a sas Provìntzias autònomas de Trento e de Bolzano a manera cumpatibile cun sos Istatutos rispetivos e sas normas de atuatzione relativas".
- DADU ATU** de sas potestades primàrgias atribuidas a sa cumpetèntzia regionale dae sa Lege Costituzionale de su 26 de freàrgiu de su 1948, n. 3;
- ATESU** chi faghet parte de sas cumpetèntzias primàrgias de sa Regione Autònoma de sa Sardigna riferidas a sas matèrias torradas a pònnera a sa potestade legislativa e amministrativa pròpia e, pro issa, tochet a su Presidente de sa Regione Autònoma de sa Sardigna, puru in calidade de Autoridade Sanitària Regionale e puru sugetu atuadore de sos interventos segundu su OCDPC 630/2020, apretziare e valutare sos interventos netzessàrios pro sa tutela de sa salute pùblica;

## ÒRDINAT

- Art. 1)** A in subra de sos metzos pùblicos de su trasportu pùblicu locale, in sas modalidades gomma, metru, ferru e marìtimu, cun esclusione de su trasportu iscolàsticu dedicadu, est cunsentidu unu coefitziente de pienadura non superiore a su 50 pro chentu de sos postos totales - previdende una riduzione prus manna de sos postos a sa rea cunforma a cussos a sètzere - istabilidos dae sas cartas de tzirculatzione o dae sos documentos currispondentes e dae sas autorizatziones regionales eventuales.
- Art. 2)** Sas istituziones iscolàsticas segundàrias de segundu gradu adotant formas flessibilesin s'organizatzione de s'atividade didàtica in cunforma a sos artìculos 4 e 5 de su decretu de su Presidente de sa Repùblica de s'8 de martzu de su 1999, n. 275, a manera chi a su nessi a su 50 pro chentu e finas a unu màssimu de su 75 pro chentu de sa populatzione de sos istudiantes de sas istituziones in antis naradas - pro sa prima chida de vigèntzia de s'Ordinàntzia presente - siat garantida s'atividade didàtica in presèntzia, semper e cando in misura non superiore a cussa cunsolidada a sa data de sa die de oe. Su chi restat de sa



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

populatzione de sos istudiantes si avalet de sa didàtica a distàntzia. Est semper garantida sa possibilidade de acumprire atividades in presèntzia si in casu mai siat netzessàriu s'impreu de laboratòrios o pro mantènnere una relazione educativa chi realizet s'inclusione iscolàstica efetiva de sos alunnos cun disabilitade e cun bisòngios educativos ispetziales, segundu cantu prevididu dae su decretu de su Ministru de s'Istruzione n. 89 de su 7 de austu de su 2020, e dae s'ordinàntzia de su Ministru de s'Istruzione n. 134 de su 9 de santugaine de su 2020,garantende semper e cando su cullegamentu on line cun sos alunnos de sa classe chi sunt in didàtica digitale integrada. S'atividade didàtica e educativa pro sos servìtzios educativos pro s'infàntzia, pro s'iscola de s'infàntzia e pro su primu tziclu de istrUZIONE s'ghit a s'acumprire de su totu in presèntzia. Est obligatòriu s'impreu de dispositivos de protettione de sas bias respiratòrias francu pro sos pitzinnos de edade inferiore a sos ses annos e pro sos sugetos cun patologias o disabilitades non cumpatibiles cun s'impreu de sos dispositivos in antis narados. Pro mantènnere su distanziamentu intrepersonale, est de si escludere cale si siat àtera forma de agregatzione alternativa, fata etzessione pro totu sas atividades indirizzate a s'aprendimentu, a su recùperu de sa sotzialidade, semper e cando cunforma a sas normas de siguresa. Sas reuniones de sos òrganos collegiales de sas istituzione iscolàsticas e educativas de ogni òrdine e gradu s'ghint a èssere acumpridas ebbia cun modalidade a distàntzia. Su rennou de sos òrganos collegiales de sas istituzione iscolàsticas, si in casu mai non acabadu, avenit segundu modalidades a distàntzia cunforma a sos printzìpios de segreteza e libertade in sa partetzipatzione a sas eletziones. Sos entes gestores providint a assicurare sa pulitzia de sos ambientes e sos acumprimentos amministrativos e contàbiles chi pertocant sos servìtzios educativos pro s'infàntzia. S'ente proprietàriu de s'immòbile podet autorizare, in acordu cun sas istituzione iscolàsticas, s'ente gestore a nde impreare sos tretos pro s'organizatzione e s'acumprimentu de atividades de giogu, ricreativas e educativas, no iscolàsticas nen formales, sena pregiudìtziu perunu pro sas atividades de sas istituzione iscolàsticas matessis. Sas atividades ant a dèvere èssere acumpridas cun s'agiudu de personale qualificadu, e cun òbligu a càrrigu de sos gestores de adotare protocollos de siguresa apòsitos cunformes a sas linias ghia segundu s'allegadu 8 a su DPCM de su 2 de martzu de su 2021 e de protzèdere a sas atividades de pulitzia e igienizatzione netzessàrias. A sas matessis cunditiones, podent èssere impreados puru tzentros isportivos pùblicos o privados.

Art. 3) Sas universidades, intesu su Comitadu universitàriu regionale de riferimentu, predisponent, segundu s'andamentu de su quadru epidemiològicu, pianos de organizatzione de sa didàtica e de sas atividades curriculares, de si acumprire a



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

distàntzia o in presèntzia, chi tenent contu de sas esigèntzias formativas e de s'isvilupu de su cuadru pandèmicu territoriale e de sas esigèntzias de siguresa sanitària cunrispondentes cunforma a sas linias ghia de su Ministèriu de s'Universitàde e de sa Chirca, segundu s'allegadu 18, e puru segundu su protocollu pro sa gestione de casos cunfirmados e sospetos de covid-19, segundu s'allegadu 22 de su DPCM de su 2 de martzu de su 2021.

Sas dispositziones segundu su comma presente si àplicant, pro cantu cumpatibiles, puru a sas Istitutziones de arta formatzione artìstica musicale e de danza, e puru sas atividades chi si divent a manera netzessària acumprìre in presèntzia, intesu su Comitadu Universitàriu Regionale de riferimentu chi podet achisire su parre, pro sos Conservatòrios de Mùsica, de su Comitadu Territoriale de Coordinamentu (CO.TE.CO.) e, pro sas Acadèmias e sos ISIA, de sa Cunferèntzia de sos Diretores cumpetente. A benefìtziu de sos istudiantes chi non resessant a partetzipare a sas atividades didàticas o curriculares de sas universidades e de sas istituzziones de arta formatzione artìstica musicale e de danza, tales atividades podent èssere acumpridas, in ue possibile, cun modalidades a distàntzia, individuadas dae sas universidades e istituzziones matessis, àpidu puru riguardu a sas esigèntzias ispetzificas de sos istudiantes cun disabilitade e de sos istudiantes cun istorbos ispetzificos de s'aprendimentu.

Art. 4) Pro totu cantu non disciplinadu a manera espresa dae s'ordinàntzia presente, si faghet rinvìu espessu a su DPCM de su 2 de martzu de su 2021 e allegados relativos.

Art. 5) Sas dispositziones de s'ordinàntzia presente produint sos efetos issoro a fàghere data dae s'8 de martzu de su 2021 finas a su 15 de martzu de su 2021, francu pròroga crara e francu ulteriores prescritziones diversas, puru de signu contràriu, chi si diant a fàghere netzessàrias in dipendèntzia de s'andamentu de sa curva de isparghidura de su virus, chi at a èssere compidada a manera costante dae sos òrganos cumpetentes de s'amministratzione e de sas aziendadas.

Francu chi su fatu non costituit reatu prus grave, sa no osservàntzia de sos òbligos segundu s'ordinàntzia presente est santzionada comente pro lege (art. 2 de su DL n. 33 de su 16 de maju de su 2020).

S'ordinàntzia presente benit trasmitida, segundu sas cumpetèntzias respetivas, a su Presidente de su Consighiu de sos Ministros, a su Ministru de sa Salude, a su Ministru de sas infrastruturas e de sa mobilitade sustenibiles, a su Ministru de s'Istruzione, a sos Amministradores de sas Provìntzias de su territòriu regionale, a su Sìndigu metropolitanu de Casteddu, a sos Sìndigos de sos Comunes de sa Sardigna, a sos Prefetos de sos Ufìtzios territoriales de Governu de sa Sardigna, a sos Assessoros regionales, a sas sotziedades e aziendadas de trasportu pùbliku locale e puru a sos àteros sugetos interessados.



REGIONE AUTÒNOMA DE SARDIGNA  
REGIONE AUTONOMA DELLA SARDEGNA

SU PRESIDENTE

Contra a s'ordinàntzia presente est ammitidu ricursu giurisditzionale a in antis de su Tribunale Amministrativu Regionale in su tèrmine de sessanta dies dae sa comunicatzione, ossiàt istraordinàriu a su Capu de s'Istadu intro de su tèrmine de dies chentubinti.

Christian Solinas



CHRISTIAN SOLINAS  
REGIONE AUTONOMA  
DE SA SARDIGNA -  
SISTEMA REGIONE  
05.03.2021 20:51:36  
UTC

Traduzione de s'operadora de s'isportellu linguisticu de Romana  
Maria Leonarda Correddu